

Հավելված

Հայաստանի Հանրապետության

ԿԳՄՍ նախարարի 2023 թվականի 27 հուլիսի

N 930-Ա հրամանի

ԸՆԹԱՑԱԿԱՐԳ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿՐԹՈՒԹՅԱՆ, ԳԻՏՈՒԹՅԱՆ, ՄՇԱԿՈՒՅԹԻ ԵՎ ՍՊՈՐՏԻ ՆԱԽԱՐԱՐՈՒԹՅԱՆ ԿՈՂՄԻՑ ԻՐԱԿԱՆԱՑՎՈՂ «ԴՊՐՈՑԱԿԱՆ ԲԱԺԱՆՈՐԴԱՅԻՆ ՀԱՄԱԿԱՐԳ» ԾՐԱԳՐԻ

I. Ընդհանուր դրույթներ

1. Սույն ընթացակարգով սահմանվում են Հայաստանի Հանրապետության պետական բյուջեի շրջանակում «Դպրոցական բաժանորդային համակարգ» ծրագրի (այսուհետ՝ Ծրագիր) իրականացման բովանդակային և ֆինանսական շրջանակը, շահառուների ներգրավման և մասնակցության պայմանները:
2. Ծրագրի նպատակն է ապահովել դպրոցականների մշակութային հաղորդակցության առաջնային իրավունքը՝ ստեղծելով նպաստավոր պայմաններ մշակույթի հասանելիության և մատչելիության համար, նպաստել հանրակրթության պետական չափորոշչով սահմանված առանցքային կարողունակությունների ձևավորմանը՝ դպրոցականների ազգային արժեհամակարգի և լայն աշխարհայացքի կայացման, ազգային և համաշխարհային մշակութային արժեքներին, ժողովրդական արվեստի լավագույն նմուշներին դասական և ժամանակակից արվեստին հաղորդակցվելու միջոցով:
3. Ծրագրի իրականացման հիմքում կրթության և մշակույթի համադրումն է՝ որպես պետական մշակութային քաղաքականության առաջնահերթություն և

Հայաստանի Հանրապետության ապագա քաղաքացիների ձևավորմանը նպաստող արժեքահեն և մշակութահեն նպատակային ծրագրի իրականացում:

4. Ծրագրի իրականացման պատասխանատու մարմինը Հայաստանի Հանրապետության կրթության, գիտության, մշակույթի և սպորտի նախարարությունն է (այսուհետ՝ Նախարարություն):

II. ԾՐԱԳՐԻ ՇԱՀԱՌՈՒՆԵՐԸ ԵՎ ԿԱԶՄԱԿԵՐՊԻՉՆԵՐԸ

5. Ծրագրի շահառուներն են Հայաստանի Հանրապետության պետական հանրակրթական դպրոցների (այսուհետ՝ դպրոցներ) 1-12-րդ դասարանների աշակերտները (այսուհետ՝ աշակերտներ):

6. Ծրագրի իրականացումն ապահովում են պետական և համայնքային ոչ առևտրային մշակութային կազմակերպությունները՝ թանգարաններն ու թատրոնները: Ծրագրին կարող են միանալ նաև ոչ պետական թատրոններն ու թանգարանները՝ նույն պայմաններով:

7. Ծրագրի մասնակից մշակութային կազմակերպությունների (այսուհետ՝ կազմակերպություններ) ցանկը հաստատվում է Հայաստանի Հանրապետության կրթության, գիտության, մշակույթի և սպորտի նախարարի հրամանով:

III. ԺԱՄԿԵՏՆԵՐԸ ԵՎ ԾՐԱԳՐԱՅԻՆ ՈՒՂՂՈՒԹՅՈՒՆՆԵՐԸ

8. Ծրագրի յուրաքանչյուր շրջափուլի ժամկետ սահմանվում է 1 (մեկ) տարի:

9. Յուրաքանչյուր շրջափուլի ընթացքում աշակերտները հնարավորություն ունեն այցելելու 2 (երկու) կազմակերպություն՝ մեկ թանգարան և մեկ թատրոն:

10. Թանգարանային այցն իրականացվում է հանրակրթության պետական չափորոշի շրջանակում՝ առարկայի կամ մի քանի առարկաների ուսումնական ծրագրի շրջանակում թեմատիկ դասի անցկացման նպատակով:

11. Թատերական ներկայացման մասնակցությունն իրականացվում է հանրակրթության պետական չափորոշի շրջանակում՝ առարկայի կամ մի քանի

առարկաների ուսումնական ծրագրին համապատասխան խաղացանկերի շրջանակում:

12. Թանգարանների և թատրոնների թեմատիկ ծրագրերի ցանկը և խաղացանկը երաշխավորվում է «Կրթության զարգացման և նորարարությունների ազգային կենտրոն» հիմնադրամի կողմից՝ համապատասխան հանրակրթության պետական չափորոշի:

13. Կազմակերպության ընտրությունը կատարում են դպրոցները՝ ըստ ուսումնական ծրագրի թեմատիկ և տարիքային համապատասխանության:

IV. ԱՅՑԵԼՈՒԹՅՈՒՆՆԵՐԻ ԿԱԶՄԱԿԵՐՊՈՒՄԸ

14. Ծրագրի այցելությունները կազմակերպություններ ամրագրվում և համաձայնեցվում են նախապես:

15. Յուրաքանչյուր կազմակերպություն ներկայացնում է Ծրագրի համակարգող, որի միջոցով կազմակերպվում է այցելությունը:

16. Այցելությունը թանգարան իրականացվում է հետևյալ սկզբունքով.

- 1) թանգարանային այցի շրջանակում աշակերտները մասնակցում են թեմատիկ դասի, կրթական ծրագրի կամ ճանաչողական շրջայցի,
- 2) խումբը պետք է բաղկացած լինի առնվազն 10, իսկ առավելագույնը 15 աշակերտից, բացառությամբ այն դեպքերի, երբ դասարանում աշակերտների թիվը մինչև 20 է,
- 3) յուրաքանչյուր խմբի համար նախատեսվում է մեկ ուղեկցող ուսուցիչ,
- 4) այցի ամրագրումը թանգարաններ կատարվում է դպրոցի կողմից նախատեսված այցից առնվազն 7 (յոթ) օր առաջ՝ նախօրոք թանգարանի հետ համաձայնեցնելով իրականացվող կրթական ծրագիրը,
- 5) սպասարկվող աշակերտների թիվը համաձայնեցվում է թանգարանի հետ՝ հաշվի առնելով թանգարանի և ծրագրի իրականացման հնարավորությունները:

6) դպրոցը կարող է չեղարկել ամրագրումը թանգարան նախատեսվող այցից առնվազն 3 օր առաջ՝ նախապես տեղեկացնելով թանգարանի կողմից ծրագրի համար ներկայացված համակարգողին:

17. Այցելությունը թատրոն իրականացվում է հետևյալ սկզբունքով.

- 1) թատրոններ այցը կազմակերպվում է դպրոցական ուսումնական ծրագրին համապատասխան խաղացանկերի շրջանակում,
- 2) թատրոնները համապատասխան խաղացանկերը հրապարակում են 3 (երեք) ամսվա կտրվածքով՝ Ծրագրի՝ տվյալ տարվա շրջափուլի մեկնարկից մեկ ամիս առաջ,
- 3) յուրաքանչյուր ներկայացման համար թատրոններն առանձնացնում են համապատասխան քանակությամբ նստատեղեր՝ դահլիճի նստատեղերի առնվազն 10 (տասը) տոկոսի չափով,
- 4) թատրոններ այցի ամրագրումը կատարվում է ներկայացումից առնվազն 20 օր առաջ,
- 5) թատրոններ այցը կարող է չեղարկվել ներկայացումից առնվազն 3 (երեք) օր առաջ:

V. ՏՈՄՍԵՐԻ ՏՐԱՄԱԴՐՈՒՄԸ, ՍՊԱՍԱՐԿՈՒՄԸ, ՀԱՇՎԱՌՈՒՄԸ

18. Տոմսերի տրամադրումն իրականացվում է Նախարարության կողմից:

19. Աշակերտների թվով տպագրված Տոմսերը նախարարության կողմից տրամադրվում են բոլոր վարչատարածքային միավորներին՝ համապատասխան ընդունման-հանձնման ակտերով:

20. Յուրաքանչյուր վարչատարածքային միավոր Տոմսերը տրամադրում է իր տարածքում հաշվառված դպրոցներին:

21. Պետական հանրակրթական դպրոցների տնօրենների կողմից բոլոր Տոմսերի վրա դրվում է դպրոցի կնիքը և տրամադրվում աշակերտներին:

22. Տոմսը բաղկացած է 2 (երկու)՝ թանգարան և թատրոն բաժիններից, որի յուրաքանչյուր հատվածում (հետնամասում) պարտադիր է դպրոցի կնիքի առկայությունը:

23. Տոմսի համապատասխան բաժինը հանձնվում է թանգարանին կամ թատրոնին՝ հետագա հաշվառման նպատակով:

24. Կազմակերպության կողմից ֆինանսավորում ստանալու համար Տոմսերը ներկայացվում են Նախարարության կողմից ներկայացված կազմակերպությանը և հաշվառվում են վերջինիս ներկայացուցչի ներկայությամբ:

25. Աշակերտներին Երևանի և մարզային թանգարաններ ու թատրոններ այցի համար տրամադրվում են տրանսպորտային միջոցներ՝ սահմանված կարգի համաձայն:

26. Ծրագրի շրջանակում տարբեր բնակավայրեր այցելությունների տրանսպորտային ծախսերը իրականացվում են պետական բյուջեի միջոցների հաշվին:

VI. ՖԻՆԱՆՍԱՎՈՐՄԱՆ ԸՆԹԱՑԱԿԱՐԳԸ

27. Ֆինանսավորումը (այսուհետ՝ փոխհատուցում) թանգարաններում կատարվում է իրականացված ուսումնական դասի, կրթական ծրագրի, ընդհանուր ուղեկցությամբ շրջայցերի համար՝ յուրաքանչյուր աշակերտի համար հաշվարկվելով 300 դրամի չափով:

28. Փոխհատուցումը թատրոններում կատարվում է յուրաքանչյուր աշակերտի համար հաշվարկվելով 1000 դրամի չափով:

29. Աշակերտների տրանսպորտային ծախսերի փոխհատուցումն իրականացվում է համաձայն Հայաստանի Հանրապետության կրթության, գիտության, մշակույթի և սպորտի նախարարի հրամանով սահմանված կարգի:

30. Ծրագրի շրջանակում ուղեկցող մանկավարժի այցն անվճար է և չի փոխհատուցվում:

31. Մանկավարժի կողմից թանգարան կամ թատրոն այցելությունը առարկայի թեմատիկ պլանավորման մեջ ներառելու, այցի միջոցով նախագծային աշխատանք իրականացնելու պարագայում տվյալ այցը հաշվարկվում է ուսուցչի աշխատաժամանակի մեջ՝ օրենսդրության համապատասխան:

32. Կազմակերպությունները յուրաքանչյուր եռամսյակին հաջորդող մեկ շաբաթվա ընթացքում ներկայացնում են հաշվետվություն:

33. Սահմանված ձևաչափին չհամապատասխանելու դեպքում Նախարարությունը ներկայացված հայտը վերադարձնում է՝ եռօրյա ժամկետում թերությունները շտկելու և կրկին ներկայացնելու համար:

34. Ներկայացված հաշվետվությունները մեկշաբաթյա ժամկետում ուսումնասիրվում և ամփոփվում են Նախարարության պատասխանատու ստորաբաժանման կողմից և Նախարարության գլխավոր քարտուղարին ներկայացվում վերջնական ամփոփ ցուցակները և կատարող կազմակերպություն(ները), որը սահմանված կարգով ներկայացվում է Նախարարության ֆինանսաբյուջետային վարչությանը՝ Փոխհատուցումն իրականացնելու համար:

VII. ԾՐԱԳՐԻ ԷԼԵԿՏՐՈՆԱՅԻՆ ԱՄՐԱԳՐՈՒՄԸ

35. Կրթության կառավարման տեղեկատվական համակարգն ապահովում է ծրագրի շահառուների և թանգարան, թատրոն մուտքի տոմսերի էլեկտրոնային ամրագրումը:

36. Կրթության կառավարման տեղեկատվական համակարգում ուսուցիչների համար հասանելի է դառնում թանգարանների կրթական ծրագրերի և շրջայցերի մասին տեղեկատվությունը, ինչպես նաև թատրոնների խաղացանկը՝ եռամսյակային կտրվածքով:

37. Ուսուցիչները յուրաքանչյուր դասարանի համար կրթության կառավարման տեղեկատվական համակարգում ընտրում են թանգարանը և թեմատիկ շրջայցը,

ինչպես նաև թատրոնն ու ներկայացումը յուրաքանչյուր ուսումնական տարի մինչև սեպտեմբերի երկրորդ շաբաթը:

38. Կրթության կառավարման տեղեկատվական համակարգում ինքնաշխատ եղանակով ձևավորվում է յուրաքանչյուր թատրոնը (ներկայացման) և թանգարանը (կրթական ծրագրի կամ թեմատիկ շրջայցի) ընտրած դպրոցների և դասարանների ցանկը:

39. Նշված ցանկերը տրամադրվում են համապատասխան թատրոնների և թանգարանների համակարգողներին:

40. Թանգարանների և թատրոնների համակարգողները, ելնելով դիմած դպրոցների և դասարանների թվից, տեղաբաշխում են այցելությունները տվյալ ամսվա, եռամսյակի կամ կիսամյակի ընթացքում՝ յուրաքանչյուր դպրոցի և դասարանի հետ համաձայնեցնելով այցելության օրն ու ժամը:

41. Հայտարարված ցանկից շեղումները կատարվում են նախարարության համաձայնությամբ և թանտրոնների համաձայնության դեպքում:

VIII. ԾՐԱԳՐԻ ԱՐԴՅՈՒՆՔՆԵՐԸ

42. Ծրագիրը հնարավորություն է տալիս Հայաստանի Հանրապետության պետական հանրակրթական դպրոցներում սովորող շուրջ 360.000 աշակերտների, անկախ սոցիալական կարգավիճակից, բնակության վայրից և մշակութային հաստատության հասանելիությունից, մասնակցել իր համայնքի կամ Հայաստանի Հանրապետության ցանկացած այլ բնակավայրի մշակութային միջոցառմանը:

43. Ծրագիրը երաշխավորում է դպրոցականների մշակութային կրթության իրավունքի իրացման նվազագույն հնարավորությունը՝ միաժամանակ մշակութային հաստատություններին ընձեռելով նոր այցելուներ ունենալու և մշակութային այլ կազմակերպությունների հետ հավասար պայմաններում մրցակցելու հնարավորություն: